

Siunnersuut uunga: Katersugaasiveqarneq pillugu Inatsisartut inatsisaat**Saqqummiussissut**

(Ilinniartitaanermut, Ilageeqarnermut, Kultureqarnermut Naligiissitaanermullu Naalakkersuisoq)

Siullermeerneqarnera

Naalakkersuisut sinnerlugit matumuuna Katersugaasiveqarneq pillugu Inatsisartut inatsisissaattut siunnersuut saqqummiutissavara.

Katersugaasiveqarneq pillugu inatsisit nalinginnaasumik nutarterneqartariaqarnerat paasineqarpoq.

Piorsarsimassutsikkut kingornussat tigussaangitsortaat ukiuni kingullerni pingaartinneqaleraluttuinnarput. Piorsarsimassutsikkut kingornussat tigussaangitsut innarlitsaalineqarnissaat pillugu UNESCO-p isumaqatigiissutaa 17. oktober 2003-meersoq Danmarkip atortussanngortitaa Kalaallit Nunaata tassunga atatillugu peqataaffigaa. Kalaallit Nunaat isumaqatigiissummut akuersaarnermigut pisussaatileerpoq piorsarsimassutsikkut kingornussat tigussaangitsut innarlitsaaliniarlugit iliuuserisariaqakkanik aalajangersaassalluni, aamma nunami inatsisiliornikkut.

Taassuma malitsigisaanik naleqquttuutinneqarpoq katersugaasiveqarneq pillugu inatsimmi erseqqissarneqassasoq piorsarsimassutsikkut kingornussat tassaammata piorsarsimassutsikkut kingornussat tigussaasut tigussaangitsullu. Aammattaaq naleqquttuutinneqarpoq, pisussaaffiit kaammattuutillu isumaqatigiissummi taaneqareersumi aalajangersagaasut eqquutsikkumallugit inatsimmi arlalitsigut erseqqissaassuteqartoqassasoq.

Siunnersuut tunngaviatigut katersugaasiveqarneq pillugu Inatsisartut peqqussutaannik atuuttumik toqqammaveqarpoq taamalu tassani aalajangersakkat amerlanerpaartaat ingerlateqqiinnarneqarlutik. Aalajangersakkanili arlalinni nalinginnaasumik ullutsinnut naleqqussaasoqarsimavoq. Taamaasilluni inatsisip atuuffiisigut, katersugaasiveqarnermi suliassatigut, Nunatta Katersugaasiveqarfiata Allagaateqarfiatalu suliassaasigut kiisalu aningaasalersuisarnikkut aalajangersakkatigut erseqqissaasoqarsimalluni.

Qulaani pineqartut saniatigut aamma siunnersuummi nutaartaavoq piorsarsimassutsikkut kingornussanut tigussaangitsunut tunngatillugu ilannguneqarmata taaguutit "nunatsinni eriagisassat pinngortitameersut" aamma "nunatsinni eriagisassat itsarnisat", Danmarkimi taaguutit "danefæ"-p aamma "danekræ"-p assingi. Tamakku qaavisigut siunnersuummi aalajangersagaliortoqarsimavoq katersugaasiviit nunanit allaniit unioqqutsitsillutik anninneqarsimasunik pissarsiaqartarsinnaaneritut inerteqquteqarneq.

Siunnersuut inatsisinut allanut nunatta piorsarsimassutsikkut kingornussaanic qulakkeerinissamik siunertaqartunut attuumassuteqarpoq, matumani pingaartumik Eqqissimatitsisarneq aamma allatigut kulturikkut eriagisassanic kulturikkut kingornussatut illersuineq pillugu Inatsisartut inatsisaat nr. 11, 19. maj 2010-meersumut.

Taamatut oqaaseqarlunga siunnersuut Inatsisartunut oqaluuserisassanngortippara.